

摘藻堂四庫全書薈要

子部

欽定四庫全書薈要

子部

御纂朱子全書卷五十二

臣

王杰詳校

詳校官員外郎臣潘紹觀

欽定四庫全書薈要卷一萬三百二十

子部

御纂朱子全書卷五十二

道統一

聖賢諸儒總論

聖賢諸儒總論
更前後聖賢其說始備自堯舜以下若不生箇孔

子後人去何處討分曉孔子後若無箇孟子也未有
分曉孟子後數千載乃始得程先生兄弟發明此理
今看來漢唐以下諸儒說道理見在史策者便直是

說夢只有箇韓文公依稀說得略似耳

今且須看孔孟程張四家文字方始講究得著實其他諸子不能無過差也

以上語類二條

恭唯道統遠自羲軒集厥大成允屬元聖述古垂訓萬世作程三千其徒化若時雨維顏曾氏傳得其宗逮思及輿益以光大自時厥後口耳失真千有餘年乃曰有繼周程授受萬理一原曰邵曰張爰及司馬學雖殊轍道則同歸俾我後人如夜復旦某以凡陋少

蒙義方中靡常師晚逢有道載鑽載仰雖未有聞賴
天之靈幸無失墜逮茲退老同好鼎來落此一丘羣
居伊始探原推本敢昧厥初冀以告虔尚其昭格陟
降庭止惠我光明傳之方來永永無斁

滄洲精舍
告先聖文

甚矣道之難明而易晦也自堯舜以至於孔孟上下二
千餘年之間蓋亦屢明而屢晦自孟氏以至於周程
則其晦者千五百年而其明者不能以百歲也程氏
既沒誦說滿門而傳之不能無失其不流而為老子

釋氏者幾希矣然世亦莫之悟也

邵州學濂溪先生祠記

孔子傳之孟軻軻之死不得其傳此非深知所傳者何事則未易言也夫孟子之所傳者何哉曰仁義而已矣孟子之所謂仁義者何哉曰仁人心也義人路也曰惻隱之心仁之端也羞惡之心義之端也如斯而已矣然則所謂仁義者又豈外乎此心哉堯舜之所以為堯舜以其盡此心之體而已禹湯文武周公孔子傳之以至於孟子其間相望有或數百年者非得

口傳耳授密相付屬也特此心之體隱乎百姓日用之間賢者識其大不賢者識其小而體其全且盡則為得其傳耳雖窮天地亙萬世而其心之所同然若合符節由是而出宰制萬物酬酢萬變莫非此心之妙用而其時措之宜又不必同也故堯舜與賢而禹與子湯放桀文王事殷武王殺受孔子作春秋以翼衰周孟子說諸侯以行王道皆未嘗同也又何害其相傳之一道而孟子之所謂仁義者亦不過使天下

之人各得其本心之所同然者耳李氏以蘇張孫吳班馬蓋不足以窺孟子之藩籬而妄議之也

讀余隱之尊孟

辯

道在目前初無隱蔽而衆人沈溺膠擾不自知覺是以聖人因其所見道體之實發之言語文字之間以開悟天下與來世其言丁寧反復明白切至唯恐人之不解了也豈有故為不盡之言以愚學者之耳目必俟其單傳密付而後可以得之哉但患學者未嘗虛

心靜慮優柔反復以味其立言之意而妄以已意輕
為之說是以不知其味而妄意乎言外之別傳耳

汪荅

叔耕○以上
文集四條

孔子 顏曾思孟 孔門弟子

夫子度量極大與堯同門弟子中如某人輩皆不點檢

他如堯容四凶在朝相似

以下論
孔子

或問孔子當衰周時可以有為否曰聖人無有不可為
之事只恐權柄不入手若得權柄在手則兵隨印轉

將遂符行近溫左氏傳見定哀時煞有可做底事問
固是聖人無不可為之事聖人有不可為之時否曰
便是聖人無不可為之時若時節變了聖人又自處
之不同又問孔子當衰周豈不知時君必不能用已
曰聖人却無此心豈有逆料人君能用我與否到得
後來說吾不復夢見周公與鳳鳥不至河不出圖吾
已矣夫時聖人亦自知其不可為矣但不知此等話
是幾時說据陳恒弑其君孔子沐浴而朝請討之時

是獲麟之年那時聖人猶欲有為也

問看聖人汲汲皇皇不肯沒身逃世只是急於救世不能廢君臣之義至於可與不可臨時依舊裁之以義曰固是但未須說急於救世自不可不仕又問若据危邦不入亂邦不居有道則見無道則隱等語却似長沮桀溺之徒做得是曰此為學者言之聖人做作又自不同又問聖人亦明知世之不可為否曰也不
是明知不可但天下無不可為之時苟可以仕則仕

至不可處便止如今時節臺諫固不可做州縣也自
做得到得居位守職却教自家枉道廢法雖一簿尉
也做不得便著去位

問自孔子後何故無聖人曰公且看三代而下那件不
薄文章字畫亦可見只緣氣日薄因問康節一元開
物閉物之說是否曰有此理不易他窺測至此

以上
語類

四
條

問顏子之學莫是先於性情上著工夫否曰然凡人為

學亦須先於性情上著工夫非獨於性情上著工夫
行步坐立亦當著工夫

以下論顏
曾思孟

或問顏子比湯如何曰顏子只據見在事業未必及湯
使其成就則湯又不得比顏子前輩說禹與顏子雖
是同道禹比顏子又粗些顏子比孟子則孟子當粗
看磨校合縫猶未有盡處若看諸葛亮只看他大體
正當細看不得

問顏子合下完具只是小要漸漸恢廓孟子合下大只

是未粹要索學以充之此莫是才具有異曰然孟子
覺有動蕩底意思

孔門只一箇顏子合下天資純粹到曾子便過於剛與
孟子相似世衰道微人欲橫流不是剛勁有腳根底
人定立不住

邵漢臣問顏淵仲弓不同曰聖人之德自是無不備其
次則自是易得不備如顏子已是煞周全了只比之
聖人更有些未完如仲弓則偏於淳篤而少顏子剛

明之意若其他弟子未見得只如曾子則大抵偏於
剛毅這終是有立脚處所以其他諸子皆無傳惟曾
子獨得其傳到子思也恁地剛毅孟子也恁地剛毅
惟是有這般人方始湊合得著惟是這剛毅等人方
始立得定子思別無可攷只孟子所稱如標使者出
諸大門之外北面再拜稽首而不受如云事之云乎
豈曰友之云乎之類這是甚麼樣剛毅

曾子父子相反參合下不曾見得只從日用間應事接

物上積累做去及至透徹那小處都是自家底了點
當下見得甚高做處却又欠闕如一座大屋只見廳
堂大槩裏面房室元不曾經歷所以夷考其行而有
不掩卒歸於狂

曾子本是魯拙後來既有所得故守得夫子規矩定其
教人有法所以有傳若子貢則甚敏見得易然又雜
往往教人亦不似曾子守定規矩故其後無傳

孔門弟子如子貢後來見識煞高然終不及曾子如一

唯之傳此是大體畢竟他落腳下手立得定壁立萬仞觀其言如彼以其富我以吾仁可以託六尺之孤士不可以不弘毅之類故後來有子思孟子其傳永遠孟子氣象尤可見

孟子比之孔門原憲謹守必不似他然他不足以及人不足以任道孟子便擔當得事

孟子不甚細膩如大匠把得繩墨定千門萬戶自在看來人全是資質韓退之云孔子之道大而能博門弟

子不能偏觀而盡識也故學焉而皆得其性之所近
此說甚好看來資質定了其為學也只就他資質所
尚處添得些小好而已所以學貴公聽並觀求一箇
是當處不貴徒執己自用今觀孔子諸弟子只除了
曾顏之外其他說話便皆有病程子諸門人上蔡有
上蔡之病龜山有龜山之病和靖有和靖之病無有
無病者或問也是後來做工夫不到故如此曰也是
合下見得不周偏差了又曰而今假令親見聖人說

話盡傳得聖人之言不差一字若不得聖人之心依

舊差了何況猶不得其言若能得聖人之心則雖言語各別不害其為同如曾子說話比之孔子又自不同子思傳曾子之學比之曾子其言語亦自不同孟子比之子思又自不同然自孔子以後得孔子之心者惟曾子子思孟子而已後來非無能言之士如揚子雲法言模倣論語王仲淹中說亦模倣論語言愈似而去道愈遠直至程子方略明得四五十年為得

聖人之心然一傳之門人則已皆失其真矣

以上語類十一

條

顏子所以發聖人之蘊恐不可以一事言蓋聖人全體

大用無不一一於顏子身上發見也

答張元德

顏子之勇只以曾子所稱數事體之於身非大勇者其

孰能之

答周舜弼

曾子之為人敦厚質實而其學專以躬行為主故其真積力久而得以聞乎一以貫之之妙然其所以自守

而終身者則固未嘗離乎孝敬信讓之規而其制行
立身又專以輕富貴守貧賤不求人知為大是以從
之遊者所聞雖或甚淺亦不失為謹厚脩潔之人所
記雖或甚疎亦必有以切於日用躬行之實

書劉子
澄所編

曾子
後

曾子受季孫之賜無可緣飾只得做不是所以後來須
要易了方死只如此看多少直截若謂因仍習俗非
曾子之為然則向所謂黽勉周旋者又豈得為曾子

之為耶要之一等是錯了不若只如此看猶不失為

仁者易辭之過也

荅王
子合

孟子之稱孔子曰可以仕則仕可以止則止可以久則久可以速則速而孔子之自言曰無可無不可又曰

我待價者也今以夫子之事觀之則斯言皆非虛語矣孟子學孔子而得其傳焉其去齊之果而出晝之遲皆天理之自然而未嘗有豪髮私心也非知其所傳者何事則何足以語是哉

讀余隱之
尊孟辯

問橫渠言孟子不得已而用潛龍也顏子潛龍勿用者也必大觀橫渠嘗曰學者貴識時顏子陋巷自樂以孔子在焉若孟子時既無人豈可不以道自任以此論之則在孟子非當潛者矣而此乃以為不得已而用者豈橫渠猶以孟子為行未成者與曰孟子以時言之固不當潛然以學言之則恐猶有且合向裏進步處橫渠此言極有味也

答吳伯豐

孟子明則動矣未變也顏子動則變矣未化也

答張敬夫○以

上文集
七條

子貢俊敏子夏謹嚴孔子門人自曾顏而下惟二子後

來想大故長進

以下論孔
門弟子

問孔門學者如子張全然務外不知如何地學却如此
曰也干他學甚事他在聖門亦豈不曉得為學之要
只是他資質是箇務外底人所以終身只是這意思
子路是箇好勇底人終身只是說出那勇底話而今
學者閒時都會說道理當如何只是臨事時依前只

是他那本來底面目出來都不如那閒時所說者

子張是箇務外底人子游是箇高簡虛曠不屑細務底人子夏是箇謹守規矩嚴毅底人因觀荀子論三子

之賤儒亦是此意蓋其末流必至是也

以上語
類三條

易筭結纓未須論優劣但看古人謹於禮法不以死生之變易其所守如此便使人有行一不義殺一不辜而得天下不為之心此是緊要處子路仕衛之失前輩論之多矣然子路却是見不到非知其非義而苟

為也

荅連
高卿

夫子乘桴之歎獨許子路之能從而子路聞之果以為
喜且看此等處聖賢氣象是如何世間許多紛紛擾
擾如百千蚊蚋鼓發狂鬧何嘗入得他胷次耶若此
等處放不下更說甚克己復禮直是無交涉也

荅楊
子順

惟三代之前帝王之興率在中土以故德行道藝之教
其行於近者著而人之觀感服習以入焉者深若夫
句吳之墟則在虞夏五服是為要荒之外爰自太伯

採藥荆蠻始得其民而端委以臨之然亦僅沒其身
而虞仲之後相傳累世乃能有以自通於上國其俗
蓋亦樸鄙而不文矣公生其間乃獨能悅周公仲尼
之道而北學於中國身通受業遂因文學以得聖人
之一體豈不可謂豪傑之士哉今以論語攷其話言
類皆簡易疎通高暢宏達其曰本之則無者雖若見
詘於子夏然要為知有本也則其所謂文學固皆有
以異乎今世之文學矣既又攷其行事則武城之政

不小其邑而必以詩書禮樂為先務其視有勇足民之效蓋有不足為者至使聖師為之莞爾而笑則其與之之意豈淺淺哉及其取人則又以二事之細而得滅明之賢亦其意氣之感默有以相契者以故近世論者意其為人必當敏於聞道而不滯於形器豈所謂南方之學得其精華者乃自古而已然也耶

江平

府常熟縣學吳公祠
記○以上文集三條

周子

問周子是從上面先見得曰也未見得是恁地否但是
周先生天資高想見下面工夫也不大故費力而今
學者須是從下學理會若下學而不上達也不成箇
學問須是尋到頂頭却從上貫下來

季通云濂溪之學精慤深密

周子看得這理熟縱橫妙用只是這數箇字都括盡了
周子從理處看邵子從數處看都只是這理砥曰畢
竟理較精粹曰從理上看則用處大數自是細碎

濂溪在當時人見其政事精絕則以為官業過人見其有山林之志則以為襟懷洒落有仙風道氣無有知其學者惟程大中獨知之這老子所見如此宜其生

兩程子也

以上語
類四條

先生博學力行聞道甚蚤遇事剛果有古人風為政精密嚴恕務盡道理嘗作太極圖易說易通數十篇在南安時年少不為守所知洛人程公珦攝通守事視其氣貌非常人與語知其為學知道也因與為友且

使二子往受學焉及為郎故事當舉代每一遷授輒以先生名聞在郴時郡守李公初平知其賢與之語而歎曰吾欲讀書何如先生曰公老無及矣某也請得為公言之於是初平日聽先生語二年果有得而程公二子即所謂河南二先生也南安獄有囚法不當死轉運使王逵欲深治之逵苛刻吏無敢相可否先生獨力爭之不聽則置手板歸取告身委之而去曰如此尚可仕乎殺人以媚人吾不為也逵亦感悟

囚得不死在郴桂陽皆有治績來南昌縣人迎喜曰
是能辨分寧獄者吾屬得所訴矣於是更相告語莫
違教命蓋不惟以抵罪為憂實以污善政為恥也在
合州事不經先生手更不敢決苟下之民不肯從蜀
之賢人君子皆喜稱之趙公時為使者人或讒先生
趙公臨之甚威而先生處之超然然趙公疑終不釋
及守虔先生適佐州事趙公熟視其所為乃悟執其
手曰幾失君矣今日乃知周茂叔也於邵州新學校

以教其人及使嶺表不憚出入之勤瘴毒之侵雖荒
崖絕島人跡所不至者必緩視徐按務以洗冤澤物
為已任施設措置未及盡其所為而病以歸矣自少
信古好義以名節自砥礪奉已甚約俸祿盡以周宗
族奉賓友家或無百錢之儲李初平卒子幼護其喪
歸葬之又往來經紀其家終始不懈及分司而歸妻
子餐粥或不給而亦曠然不以為意也襟懷飄灑雅
有高趣尤樂佳山水遇適意處或徜徉終日廬山之

麓有溪焉發源於蓮華峰下潔清紺寒下合於湓江
先生濯纓而樂之因寓以濂溪之號而築書堂於其
上豫章黃太史庭堅詩而序之曰茂叔人品甚高曾
中灑落如光風霽月知德者亦深有取其言云

濂溪先生

事實記

道之在天下者未嘗亡惟其託於人者或絕或續故其
行於世者有明有晦是皆天命之所為非人智力之
所能及也夫天高地下而二氣五行紛綸錯糅升降

往來於其間其造化發育品物散殊莫不各有固然之理而最其大者則仁義禮智之性君臣父子昆弟夫婦朋友之倫是已是其周流充塞無所虧間夫豈以古今治亂為存亡者哉然氣之運也則有醇漓判合之不齊人之稟也則有清濁昏明之或異是以道之所以託於人而行於世者惟天所畀乃得與焉決非巧智果敢之私所能億度而強探也河圖出而八卦畫洛書呈而九疇敘而孔子於斯文之興喪亦未

嘗不推之於天聖人於此其不我欺也審矣若濂溪先生者其天之所畀而得乎斯道之傳者與不然何其絕之久而續之易晦之甚而明之亟也蓋自周衰孟軻氏沒而此道之傳不屬更秦及漢歷晉隋唐以至於我有宋聖祖受命五星集奎實開文明之運然後氣之漓者醇判者合清明之稟得以全付乎人而先生出焉不由師傳默契道體建圖屬書根極領要當時見而知之有程氏者遂擴大而推明之使夫天

理之微人倫之著事物之衆鬼神之幽莫不洞然畢貫於一而周公孔子孟氏之傳煥然復明於當世有志之士得以探討服行而不失其正如出於三代之前者嗚呼盛哉非天所畀其孰能與於此

江州重建濂溪先生

書堂記

蒙諭及二程之於濂溪亦若橫渠之於范文正耳先覺相傳之秘非後學所能窺測誦其詩讀其書則周范之造詣固殊而程張之契悟亦異如曰仲尼顏子所

樂吟風弄月以歸皆是口傳心受的當親切處後來
二先生舉似後學亦不將作第二義看然則行狀所
謂反求之六經然後得之者特語夫功用之大全耳
至其入處則自濂溪不可誣也若橫渠之於文正則
異於是蓋當時粗發其端而已受學乃先生自言此
豈自誣者耶大抵近世諸公知濂溪甚淺如呂氏童
蒙訓記其嘗著通書而曰用意高遠夫通書太極之
說所以明天理之根源究萬物之終始豈用意而為

之又何高下遠近之可道哉

與汪尚書○以上文集三條

太極圖只是一箇實理一以貫之

以上論周子書

易有太極是生兩儀四象八卦皆有形狀至於太極有何形狀故周子曰無極而太極蓋云無此形狀而有此道理耳

周子所謂無極而太極非謂太極之上別有無極也但言太極非有物耳如云上天之載無聲無臭故云無極之真二五之精既言無極則不復別舉太極也若

如今說則此處豈不欠一太極字耶

無極是有理而無形如性何嘗有形太極是五行陰陽之理皆有不是空底物事若是空時如釋氏說性相似又曰釋氏只見得箇皮殼裏面許多道理他却不見他皆以君臣父子為幻妄

無極而太極不是太極之外別有無極無中自有此理又不可將無極便做太極無極而太極此而字輕無次序故也動而生陽靜而生陰動即太極之動靜即

太極之靜動而後生陽靜而後生陰生此陰陽之氣
謂之動而生靜而生則有漸次也一動一靜互為其
根動而靜靜而動闢闔往來更無休息分陰分陽兩
儀立焉兩儀是天地與畫卦兩儀意思又別動靜如
晝夜陰陽如東西南北分從四方去一動一靜以時
言分陰分陽以位言

因問太極圖所謂太極莫便是性否曰然此是理也問
此理在天地間則為陰陽而生五行以化生萬物在

人則為動靜而生五常以應萬事曰動則此理行此動中之太極也靜則此理存此靜中之太極也

問太極動然後生陽則是以動為主曰纔動便生陽不是動了而後生這箇只得且從動上說起其實此之所以動又生於靜上面之靜又生於動此理只循環生去動靜無端陰陽無始

周子謂五殊二實二本則一一實萬分萬一各正大小有定自下推而上去五行只是二氣二氣又只是一

理自上推而下來只是此一箇理萬物分之以為體
萬物之中又各具一理所謂乾道變化各正性命然
總又只是一箇理此理處處皆渾淪如一粒粟生為
苗苗便生花花便結實又成粟還復本形一穗有百
粒每粒箇箇完全又將這百粒去種又各成百粒生
生只管不已初間只是這一粒分去物物各有理總
只是一箇理曰鳶飛魚躍皆理之流行發見處否曰
固是然此段更須將前後文通看

或問太極圖之說曰以人身言之呼吸之氣便是陰陽
軀體血肉便是五行其性便是理又曰其氣便是春
夏秋冬其物便是金木水火土其理便是仁義禮智
信

某許多說話是太極中說已盡太極便是性動靜陰陽
是心金木水火土是仁義禮智信化生萬物是萬事
又云無極之真二五之精妙合而凝此數句甚妙是
氣與理合而成性也

問無極而太極先生謂此五字添減一字不得而周子
言無極之真却又不言太極曰無極之真已該得太
極在其中真字便是太極又問太極動而生陽靜而
生陰靜極復動則動復生陽靜復生陰不知分陰陽
以立兩儀在靜極復動之前為復在後曰動而生陽
靜而生陰則陰陽分而兩儀立矣靜極復動以後所
以明混闢不窮之妙

氣化是當初一箇人無種後自生出來底形生却是有

此一箇人後乃生生不窮底

形既生矣形體陰之為也神發知矣神知陽之為也蓋陰主翕凡斂聚成就者陰為之也陽主闢凡發暢揮散者陽為之也

問五性感動而善惡分曰天地之性是理也才到有陰陽五行處便有氣質之性於此便有昏明厚薄之殊得其秀而最靈乃氣質以後事

問周子不言禮智而言中正如何曰禮智說得猶寬中

正則切而實矣且謂之禮尚或有不中節處若謂之中則無過不及無非禮之禮乃節文恰好處也謂之智尚或有正不正若謂之正則是非端的分明乃智之實也

問處之也正裁之也義處與裁字二義頗相近曰然處是居之裁是就此事上裁度又曰處字作居字即分曉

問聖人定之以中正仁義曰本無先後此四字配金木

水火而言中有禮底道理正有智底道理如乾之元亨利貞元即仁亨即中利即義貞即正皆是此理至於主靜是以正與義為體中與仁為用聖人只是主靜自有動底道理譬如人說話也須是先沈默然後可以說話蓋沈默中便有箇言語底意思

聖人定之以中正仁義此四物常在這裏流轉然常靠著箇靜做主若無夜則做得晝不分曉若無冬則做得春夏不長茂如人終日應接却歸來這裏空處少

歇便精神較健如生物而無冬只管一向生去元氣
也會竭了中仁是動正義是靜通書都是恁地說如
云禮先而樂後

問中正仁義而主靜中仁是動正義是靜如先生解曰
非此心無欲而靜則何以酬酢事物之變而一天下
之動哉今於此心寂然無欲而靜處欲見所謂正義
者何以見曰只理之定體便是又曰只是那一箇定
理在此中截然不相侵犯雖然就其中又各有動靜

如惻隱是動仁便是靜羞惡是動義便是靜

問又言無欲故靜何也曰欲動情勝則不能靜

聖人定之以中正仁義而主靜正是要人靜定其心自作主宰程子又恐只管靜去遂與事物不相交涉却說箇敬云敬則自虛靜須是如此做工夫

太極圖首尾相因脈絡貫通首言陰陽變化之原其後即以人所稟受明之自惟人也得其秀而最靈所謂最靈純粹至善之性也是所謂太極也形生神發則

陽動陰靜之為也五性感動則陽變陰合而生水火
木金土之性也善惡分則成男成女之象也萬事出
則萬物化生之義也至聖人定之以中正仁義而主
靜立人極焉則又有以得乎太極之全體而與天地
混合而無閒矣故下又言天地日月四時鬼神四者
無不合也

太極首言性命之源用力處却在脩吉悖凶其本則主
於靜

林問太極原始反終故知死生之說南軒解與先生解不同如何曰南軒說不然恐其偶思未到周子太極之書如易六十四卦一一有定理豪髮不差自首至尾只不出陰陽二端而已始處是生生之初終處是已定之理始有處說生已定處說死死則不復變動矣因舉張乖崖說斷公事以為未判底事皆屬陽已判之事皆屬陰以為不可改變通書無非發明此二端之理

問先生謂程子不以太極圖授門人蓋以未有能受之者然而孔門亦未嘗以此語顏曾是如何曰焉知其不曾說曰觀顏曾做工夫處只是切已做將去曰此亦何嘗不切已皆非在外乃我所固有也曰然此恐徒長人億度料想之見曰理會不得者固如此若理會得者莫非在我便可受用何億度之有

君子脩之吉小人悖之凶而今看他說這物事這機關一下撥轉後卒乍攔他不住聖人所以一日二日萬

幾兢兢業業如臨深淵如履薄冰只是大化恁地流行隨得是便好隨得不是便唱他不住存心養性所以事天也夭壽不貳脩身以俟之所以立命也所以昨日說西銘都相穿透

周子留下太極圖若無通書却教人如何曉得故太極圖得通書而始明

直卿云通書便可上接語孟曰此語孟較分曉精深結構得密語孟說得較闊

大哉乾元萬物資始誠之源也此統言一箇流行本源
乾道變化各正性命誠之流行出來各自有箇安頓
處如為人也是這箇誠為物也是這箇誠故曰誠斯
立焉譬如水其出只一源及其流出來千派萬別也
只是這箇水

是問舉一陰一陽之謂道以下三句是證上文否曰固
是一陰一陽之謂道一句通證誠之源大哉乾元至
誠斯立焉二節繼之者善又證誠之源一節成之者

性證誠斯立焉一節

問濂溪論性自氣稟言却是上面已說太極誠不妨如
孔子說性相近習相遠不成是不識如荀揚便不可
曰然他已說純粹至善

直卿問利貞誠之復如先生注下言復如伏藏先生曰
復只是回來這箇是周先生添這一句孔子只說乾
道變化各正性命又曰這箇物事流行到這裏來這
裏住著却又復從這裏做起又曰如母子相似未生

之時母無氣不能生其子既生之後子自是子母自是母又曰如樹上開一花結一子未到利貞處尚是運下面氣去蔭他及他到利貞處自不用養又問自一念之萌以至於事之得其所是一事之元亨利貞先生應之曰他又自這裏做起所謂生生之謂易也是恁地又記曰氣行到這裏住著便立在這裏既立在這裏則又從這裏做起

誠下一章言太極之在人者

問誠五常之本同此實理於其中又分此五者之用曰
然

問果而確果者陽決確者陰守曰此只是一事而首尾
相應果而不確即無所守確而不果則無決二者不
可偏廢猶陰陽不可相無也

誠無為誠實理也無為猶寂然不動也實理該貫動靜
而其本體則無為也幾善惡幾者動之微動則有為
而善惡形矣誠無為則善而已動而有為則有善有

惡

曾問誠無為幾善惡曰誠是實理無所作為便是天命之謂性喜怒哀樂未發之謂中幾者動之微微動之初是非善惡於此可見一念之生不是善便是惡孟子曰道二仁與不仁而已矣是也德者有此五者而已仁義禮智信者德之體曰愛曰宜曰理曰通曰守者德之用

濂溪言誠無為幾善惡才誠便行其所無事而幾有善

惡之分於此之時宜當窮察識得是非其初有豪忽之微至其窮察之久漸見充越之大自然有箇道理開裂在那裏此幾微之決善惡之分也若於此分明則物格而知至知至而意誠意誠而心正身脩而家齊國治天下平如激湍水自己不得如田單火牛自止不住

或舉季通語通書誠無為幾善惡與太極惟人也得其秀而最靈形既生矣神發知矣五性感動而善惡分

二說似乎相背既曰無為矣如何又却有善惡之幾
恐是周子失照管處如何曰當寂然不動時便是誠
無為有感而動即有善惡幾是動處大凡人性不能
不動但要頻放得是於其所動處頻放得是時便是
德愛曰仁宜曰義頻放得不是時便一切反是人性
豈有不動但須於中分得天理人欲方是

或問有陰陽便有善惡曰陰陽五行皆善又曰陰陽之
理皆善又曰合下只有善惡是後一截事又曰豎起

看皆善橫看後一截方有惡又曰有善惡理却皆善
德愛曰仁至守曰信德者人之得於身者也愛宜理通
守者德之用仁義禮智信者德之體理謂有條理通
謂通達守謂確實此三句就人身而言誠性也幾情
也德兼性情而言也

性焉安焉之謂聖是就聖人性分上說發微不可見充
周不可窮之謂神是他人見其不可測耳

問性者獨得於天如何言獨得曰此言聖人合下清明

完具無所虧欠此是聖人所獨得者此對了復字說
復者已失而反其初便與聖人獨得處不同安字對
了執字說執是執持安是自然大率周子之言秤等
得輕重極是合宜因問周子之學是自得於心還有
所傳授否曰也須有所傳授渠是陸詵壻溫公涑水
記聞載陸詵事是箇篤實長厚底人

發微不可見充周不可窮之謂神言其發也微妙而不
可見其充也周徧而不可窮發字充字就人看如性

焉安焉執焉復焉皆是人如此微不可見周不可窮
却是理如此神只是聖之事非聖外又有一箇神別
是箇地位也

問通書言神者五其義同否曰當隨所在看曰神只是
以妙言之否曰是且說感而遂通者神也橫渠謂一
故神兩在故不測因指造化而言曰忽然在這裏又
忽然在那裏便是神曰在人言之則如何曰知覺便
是神觸其手則手知痛觸其足則足知痛便是神神

應故妙

幾善惡言衆人者也動而未形有無之間也言聖人豪釐發動處此理無不見寂然不動者誠也至其微動處即是幾幾在誠神之間

幾雖已感却是方感之初通則直到末梢皆是通也如推其極到協和萬邦黎民於變時雍亦只是通也幾却只在起頭一些子

通書多說幾太極圖上却無此意曰五性感動動而未

分者便是

安卿問誠神幾學者當從何入曰隨處做工夫誠是存
主處發用處是神幾是決擇處然緊要處在幾

動而正曰道言動而必正為道否則非也用而和曰德
德有熟而不喫力之意

問性者剛柔善惡中而已曰此性便是言氣質之性四
者之中去却兩件剛惡柔惡却又剛柔二善中擇中
而主焉

正淳問通書注中字處引允執厥中曰此只是無過不及之中書傳中所言皆如此只有喜怒哀樂未發之中一處是以體言到中庸字亦非專言體便有無過不及之意

人之生不幸不聞過大不幸無恥此兩句只是一項事知恥是由內心以生聞過是得之於外人須知恥方能過而改故恥為重

問無思本也思通用也無思而無不通為聖人不知聖

人是有思耶無思耶曰無思而無不通是聖人必思而後無不通是睿時舉云聖人寂然不動是無思才感便通特應之耳曰聖人也不是塊然由人撥後方動如莊子云推而行曳而止之類只是才思便通不待大故地思索耳

幾是事之端緒有端緒方有討頭處這方是用得思問聖希天若論聖人自是與天相似了得非聖人未嘗自以為聖雖已至聖處而猶戒謹恐懼未嘗頃刻忘

所法則否曰不消如此說天自是天人自是人終是
如何得似天自是用法天明王奉若天道建邦設都
無非法天者大事大法天小事小法天

竇問志伊尹之志學顏子之學所謂志者便是志於行
道否曰志伊尹之所志不是志於私大抵古人之學
本是欲行伊尹耕於有莘之野而樂堯舜之道凡所
以治國平天下者無一不理會但方處畎畝之時不
敢言必於用耳及三聘幡然便向如此做去此是堯

舜事業看二典之書堯舜所以卷舒作用直如此熟
因說耿守向曾說用之則行舍之則藏惟我與爾有
是夫此非專為用舍行藏凡所謂治國平天下之具
惟夫子顏子有之用之則抱持而往不用則卷而懷
之曰某不敢如此說若如此說即是孔顏習次全無
些洒落底氣象只是學得許多骨董將去治天下又
如龜山說伊尹樂堯舜之道只是出作入息飢食渴
飲而已即是伊尹在莘郊時全無些能解及至伐夏

救民逐旋叫喚起來皆說得一邊事今世又有一般人只道飽食煖衣無外慕便如此涵養去亦不是須是一一理會去

志伊尹之所志學顏子之所學志固是要立得大然其中又自有先後緩急之序致廣大而盡精微若曰未到伊尹田地做未得不成塊然喫飯都不思量天下之事若是見州郡所行事有不可人意或百姓遭酷虐自家寧不惻然動心若是朝夕憂慮以天下國家

為念又那裏教你恁地來或曰聖賢憂世之志樂天之誠蓋有並行而不相悖者如此方得曰然便是怕人倒向一邊去今人若不塊然不以天下為志便又切切然理會不干已事如世間一樣學問專理會典故世務便是如此古之欲明明德於天下者合下學便是學此事既曰欲明明德於天下不成只恁地空說裏面有幾多工夫

問動而無動靜而無靜曰此說動而生陽動極而靜靜

而生陰靜極復動此自有箇神在其間不屬陰不屬陽故曰陰陽不測之謂神且如晝動夜靜在晝間神不與之俱動在夜間神不與之俱靜神又自是神神却變得晝夜晝夜却變不得神神妙萬物如說水陰根陽火陽根陰已是有形象底是說粗底了又曰靜者為主故以蒙艮終云

問動而無動靜而無靜神也此理如何曰譬之晝夜晝固是屬動然動却來管那神不得夜固是屬靜靜亦

來管那神不得蓋神之為物自是超然於形器之表
貫動靜而言其體常如是而已矣

混兮闢兮混言太極闢言為陰陽五行以後故末句曰
其無窮兮言既闢之後為陰陽五行為萬物無窮盡
也

通書論樂意極可觀首尾有條理只是淡與不淡和與
不和

問通書注云而其制作之妙真有以得乎聲氣之元不

知而今尚可尋究否曰今所爭祇是黃鐘一宮耳這裏高則都高這裏低則都低蓋難得其中耳問胡安定樂如何曰亦是一家

問伊川云為士必志於聖人周子乃云一為要一者無欲也何如曰若注釋古聖賢之書恐認當時聖賢之意不親切或有悞處此書乃周子自著不應有差一者無欲一便是無欲今試看無欲之時心豈不一又問此主一之敬如何曰無欲之與敬二字分明要之

持敬頗似費力不如無欲撒脫人只為有欲此心便千頭萬緒此章之言甚為緊切學者不可不知

問一是純一靜虛是此心如明鑑止水無一豪私欲填於其中故其動也無非從天理流出無一豪私欲撓之靜虛是體動直是用曰也是如此靜虛易看動直難看靜虛只是伊川云中有主則虛虛則邪不能入是也若物來奪之則實實則暗暗則塞動直只是其動也更無所礙若少有私欲便礙便曲要恁地做又

不要恁地做便自有窒礙便不是直曲則私私則狹
問聖學章一者是表裏俱一純徹無二少有纖豪私欲
便二矣內一則靜虛外一則動直而明通公溥則又
無時不一也一者此心渾然太極之體無欲者心體
粹然無極之真靜虛者體之未發豁然絕無一物之
累陰之性也動直者用之流行坦然由中道而出陽
之情也明屬火通屬木公屬金溥屬水明通則靜極
而動陰生陽也公溥則動極而靜陽生陰也而無欲

者又所以貫動靜明通公溥而統於一則終始表裏
一太極也不審是否曰只四象分得未是此界兩邊
說明屬靜邊通屬動邊公屬動邊溥屬靜邊明是貞
屬水通是元屬木公是亨屬火溥是利屬金只恁地
循環去明是萬物收斂醒定在這裏通是萬物初發
達公是萬物齊盛溥是秋來萬物溥徧成遂各自分
去所謂各正性命曰在人言之則如何曰明是曉得
事物通是透徹無窒礙公是正無偏陂溥是溥徧萬

事便各有箇理去直卿曰通者明之極溥者公之極
曰亦是

彰言道之顯微言道之隱匪靈弗瑩言彰與微須靈乃
能了然照見無滯礙也此三句是言理別一本靈作
虛義短剛善剛惡柔亦如之中焉止矣此三句言性
二氣五行以下並言命實是實理

厥彰厥微只是說理有大小精粗如人事中自有難曉
底道理如君仁臣忠父慈子孝此理甚顯然若陰陽

性命鬼神往來則不亦微乎

鄭問理性命章何以下分字曰不是割成片去只如月映萬川相似

萬一各正小大有定言萬箇是一箇一箇是萬箇蓋體統是一太極然又一物各具一太極所謂萬一各正猶言各正性命也

爰問五殊二實一段先生說了又云中庸如天之無不覆幬地之無不持載止是一箇大底包在中間又有

四時錯行日月代明自有細小去處道並行而不相悖萬物並育而不相害並行並育便是那天地覆載不相悖不相害便是那錯行代明底小德川流是說小細底大德敦化是那大底大底包小底小底分大底千五百年間不知人如何讀這箇都似不理會得這道理又云一實萬分萬一各正便是理一分殊處問理性命章注云自其本而之末則一理之實而萬物分之以為體故萬物各有一太極如此則是太極有

分裂乎曰本只是一太極而萬物各有稟受又自各全具一太極耳如月在天只一而已及散在江湖則隨處而見不可謂月已分也

問顏子能化而齊曰此與大而化之之化異但言消化却富貴貧賤之念方能齊齊亦一之意

杜旂問濂溪言道至貴者不一而足曰周先生是見世間愚輩為外物所搖動如墮在火坑中不忍見他故如是說不一世人心不在殼子裏如發狂相似只是

自不覺

問極重不可反識其重而亟反之可也曰是說天下之勢如秦至始皇强大六國便不可敵東漢之末宦官權重便不可除紹興初只斬陳少陽便成江左之勢極重則反之也難識其重之機而反之則易

文所以載道一章之大意輪轅飾而人弗庸徒飾也言有載道之文而人弗用也況虛車乎此不載道之文也自篤其實至行而不遠是輪轅飾而人庸之者也

自不賢者至強之不從也是弗庸者也自不知務道德至藝而已虛車也

或問發聖人之蘊教萬世無窮者顏子也曰夫子之道如天惟顏子盡得之夫子許多大意思盡在顏子身上發見譬如天地生一瑞物即此物上盡可以見天地純粹之氣謂之發者乃亦足以發之發不必待顏子言然後謂之發也

精謂心之精微也蘊謂德所蘊蓄也

聖人之蘊因卦以發易本未有許多道理因此卦遂將許多道理搭在上面所謂因卦以發者也

問聖人之精聖人之蘊曰精是精微之意蘊是包許多道理又問伏羲始畫而其蘊亦已發見於此否曰謂之已具於此則可謂之已發見於此則不可方其初畫也未有乾四德意思到孔子始推出來然文王孔子雖能推出意思而其道理亦不出伏羲始畫之中故謂之蘊蘊如衣敝緼袍之緼是包得在裏面

饒錄云方

其初畫出來未有今易中許多事到文王
孔子足得出來而其理亦不外乎始畫

精是聖人本意蘊是偏旁帶來道理如春秋聖人本意
只是載那事要見世變禮樂征伐自諸侯出臣弑其
君子弑其父如此而已就那事上見得是非美惡曲
折便是因卦以發底如易有太極是生兩儀兩儀生
四象四象生八卦是聖人本意底如文王繫辭等孔
子之言皆是因而發底不可一例作重看

乾乾不息者體日往月來寒往暑來者用有體則有用

有用則有體不可分先後說

第一句言乾乾不息第二句言損第三句言益者蓋以解第一句若要不息須著去忿慾而有所遷改中乾之用其善是其字疑是莫字蓋與下兩句相對若只是其字則無義理說不通

問此章前面懲忿窒慾遷善改過皆是自脩底事後面忽說動者何故曰所謂懲忿窒慾遷善改過皆是動上有這般過失須於方動之時審之方無凶悔吝所

以再說箇動

問止非為也為不止矣何謂也曰止便不作為作為便不是止曰止是以心言否曰是淳舉易傳內欲不萌外物不接曰即是這止

以上語類八十五條

蓋嘗竊謂先生之言其高極乎無極太極之妙而其實不離乎日用之間其幽探乎陰陽五行造化之蹟而其實不離乎仁義禮智剛柔善惡之際其體用之一源顯微之無間秦漢以下誠未有臻斯理者而其實

則不外乎六經論語中庸大學七篇之所傳也蓋其
所謂太極云者合天地萬物之理而一名之耳以其
無器與形而天地萬物之理無不在是故曰無極而
太極以其具天地萬物之理而無器與形故曰太極
本無極也是豈離乎生民日用之常而自為一物哉
其為陰陽五行造化之蹟者固此理也其為仁義禮
智剛柔善惡者亦此理也性此理而安焉者聖也復
此理而執焉者賢也自堯舜以來至於孔孟其所以

相傳之說豈有一言以易此哉顧孟氏既沒而諸儒之智不足以及此是以世之學者茫然莫知所適高則放於虛無寂滅之外卑則溺於雜博華靡之中自以為道固如是而莫或知其非也及先生出始發明之以傳於程氏而其流遂及於天下天下之學者於是始知聖賢之所以相傳之實乃出於此而有以用其力焉此先生之教所以繼往聖開來學而大有功於斯世也

隆興府學濂溪先生祠記

先生之精立圖以示先生之蘊因圖以發而其所謂無極而太極云者又一圖之綱領所以明夫道之未始有物而實為萬物之根柢也夫豈以為太極之上復有所謂無極者哉近世讀者不足以識此而或妄議之既以為先生病史氏之傳先生者乃增其語曰自無極而為太極則又無所依據而重以病夫先生故某嘗欲援故相蘇公請刊國史草頭木脚之比以正

其失

邵州學濂溪先生祠記

天地之間只有動靜兩端循環不已更無餘事此之謂
易而其動其靜則必有所以動靜之理焉是則所謂
太極者也聖人既指其實而名之周子又為之圖以
象之其所以發明表著可謂無餘蘊矣原極之所以
得名蓋取樞極之義聖人謂之太極者所以指夫天
地萬物之根也周子因之而又謂之無極者所以著
夫無聲無臭之妙也然而無極而太極太極本無極
則非無極之後別生太極而太極之上先有無極也

又曰五行陰陽陰陽太極則非太極之後別生二五而二五之上先有太極也。以至於成男成女化生萬物而無極之妙。蓋未始不在是焉。此一圖之綱領大易之遺意。與老子所謂物生於有。有生於無。而以造化為真有始終者。正南北矣。來諭乃欲一之所以於此圖之說。多所乖礙。而不得其理也。

荅楊子直

先天乃伏羲本圖。非康節所自作。雖無言語而所該甚廣。凡今易中一字一義。無不自其中流出者。太極却

是濂溪自作發明易中大槩綱領意思而已故論其

格局則太極不如先天之大而詳論其義理則先天

不如太極之精而約蓋合下規模不同而太極終在

先天範圍之內又不若彼之自然不假思慮安排也

若以數言之則先天之數自一而二自二而四自四

而八以為八卦太極之數亦自一而二剛自二而四

剛善剛惡遂加其一柔善柔惡中以爲五行而遂下及於萬物

蓋物理本同而象數亦無二致但推得有大小詳略

耳

荅黃直卿

伏承示諭太極西銘之失備悉指意然二書之說從前不敢輕議非是從人脚根依他門戶却是反覆看來道理實是如此別未有開口處所以信之不疑而妄以已見輒為之說正恐未能盡發其奧而反以累之豈敢自謂有扶掖之功哉今詳來教及省從前所論却恐長者從初便忽其言不曾致思只以自家所見道理為是不知却元來未到他地位而便以已見輕

肆抵排也今亦不暇細論只如太極篇首一句最是
長者所深排然殊不知不言無極則太極同於一物
而不足為萬化之根不言太極則無極淪於空寂而
不能為萬化之根只此一句便見其下語精密微妙
無窮而向下所說許多道理條貫脈絡井井不亂只
今便在目前而亙古亙今顛撲不破只恐自家見得
未曾如此分明直截則其所可疑者乃在此而不在
彼也至於西銘之說猶更分明今亦且以首句論之

人之一身固是父母所生然父母之所以為父母者
即是乾坤若以父母而言則一物各一父母若以乾
坤而言則萬物同一父母矣萬物既同一父母則吾
體之所以為體者豈非天地之塞吾性之所以為性
者豈非天地之帥哉古之君子惟其見得道理真實
如此所以親親而仁民仁民而愛物推其所為以至
於能以天下為一家中國為一人而非意之也今若
必謂人物只是父母所生更與乾坤都無干涉其所

以有取於西銘者但取其姑為宏闊廣大之言以形容仁體而破有我之私而已則是所謂仁體者全是虛名初無實體而小己之私却是實理合有分別聖賢於此却初不見義理只見利害而妄以己意造作言語以增飾其所無破壞其所有也若果如此則其立言之失膠固二字豈足以盡之而又何足以破人之梏於一己之私哉大抵古之聖賢千言萬語只是要人明得此理此理既明則不務立論而所言無非

義理之言不務正行而所行無非義理之實無有初
無此理而姑為此言以救時俗之弊者不知子靜相
會曾以此話子細商量否

荅陸
子美

前書誨諭之悉敢不承教所謂古之聖賢惟理是視言
當於理雖婦人孺子有所不棄或乖理致雖出古書
不敢盡信此論甚當非世儒淺見所及也但某竊謂
言不難擇而理未易明若於理實有所見則於人言
之非是不翅黑白之易辨固不待訊其人之賢否而

為去取不幸而吾之所謂理者或但出於一己之私
見則恐其所取舍未足以為羣言之折衷也況理既
未明則於人之言恐亦未免有未盡其意者又安可
以遽絀古書為不足信而直任胷臆之所裁乎來書
反復其於無極太極之辨詳矣然以某觀之伏羲作
易自一畫以下文王演易自乾元以下皆未嘗言太
極也而孔子言之孔子贊易自太極以下未嘗言無
極也而周子言之夫先聖後聖豈不同條而共貫哉

若於此有以灼然實見太極之真體則知不言者不
為少而言之者不為多矣何至若此之紛紛哉今既
不然則吾之所謂理者恐其未足以為羣言之折衷
又況於人之言有所不盡者又非一二而已乎既蒙
不鄙而教之某亦不敢不盡其愚也且夫大傳之太
極者何也即兩儀四象八卦之理具於三者之先而
蘊於三者之內者也聖人之意正以其究竟至極無
名可名故特謂之太極猶曰舉天下之至極無以加

此云爾初不以其中而命之也至如北極之極屋極之極皇極之極民極之極諸儒雖有解為中者蓋以此物之極常在此物之中非指極字而訓之以中也極者至極而已以有形者言之則其四方八面合轆將來到此築底更無去處從此推出四方八面都無向背一切停勻故謂之極耳後人以其居中而能應四外故指其處而以中言之非以其義為可訓中也至於太極則又初無形象方所之可言但以此理至

極而謂之極耳今乃以中名之則是所謂理有未明而不能盡乎人言之意者一也通書理性命章其首二句言理次三句言性次八句言命故其章內無此三字而特以三字名其章以表之則章內之言固已各有所屬矣蓋其所謂靈所謂一者乃為太極而所謂中者乃氣稟之得中與剛善剛惡柔善柔惡者為五性而屬乎五行初未嘗以是為太極也且曰中焉止矣而又下屬於二氣五行化生萬物之云是亦復

成何等文字義理乎今來論乃指其中者為太極而屬之下文則又理有未明而不能盡乎人言之意者二也若論無極二字乃是周子灼見道體迥出常情不顧旁人是非不計自己得失勇往直前說出人不顧說底道理今後之學者曉然見得太極之妙不屬有無不落方體若於此看得破方見得此老真得千聖以來不傳之秘非但架屋上之屋疊牀上之牀而已也今必以為未然是又理有未明而不能盡人言

之意者三也至於太極既曰形而上者謂之道矣而
又曰一陰一陽之謂道此豈真以陰陽為形而上者
哉正所以見一陰一陽雖屬形器然其所以一陰而
一陽者是乃道體之所為也故語道體之至極則謂
之太極語太極之流行則謂之道雖有二名初無兩
體周子所以謂之無極正以其無方所無形狀以為
在無物之前而未嘗不立於有物之後以為在陰陽
之外而未嘗不行乎陰陽之中以為通貫全體無乎

不在則又初無聲臭影響之可言也今乃深詆無極之不然則是以太極為有形狀有方所矣直以陰陽為形而上者則又昧於道器之分矣又於形而上者之上復有況太極乎之語則是又以道上別有一物為太極矣此又理有未明而不能盡乎人言之意者四也至某前書所謂不言無極則太極同於一物而不足為萬化根本不言太極則無極淪於空寂而不能為萬化根本乃是推本周子之意以為當時若不

如此兩下說破則讀者錯認語意必有偏見之病聞人說有即謂之實有見人說無即謂之真無耳自謂如此說得周子之意已是太煞分明只恐知道者厭其漏洩之過甚不謂如老兄者乃猶以為未穩而難曉也請以某書上下文意詳之豈謂太極可以人言而為加損者哉是又理有未明而不能盡乎人言之意者五也來書又謂大傳明言易有太極今乃言無何耶此尤非所望於高明者今夏因與人言易其人

之論正如此當時對之不覺失笑遂至被劾彼俗儒
膠固隨語生解不足深怪老兄平日自視為如何而
亦為此言耶老兄且謂大傳之所謂有果如兩儀四
象八卦之有定位天地五行萬物之有常形耶周子
之所謂無是果虛空斷滅都無生物之理耶此又理
有未明而不能盡乎人言之意者六也老子復歸於
無極無極乃無窮之義如莊生入無窮之門以遊無
極之野云爾非若周子所言之意也今乃引之而謂

周子之言實出乎彼此又理有未明而不能盡乎人
言之意者七也高明之學超出方外固未易以世閒
言語論量意見測度今且以愚見執方論之則其未
合有如前所陳者亦欲奉報又恐徒為紛紛重使世
俗觀笑既而思之若遂不言則恐學者終無所取正
較是二者寧可見笑於今人不可得罪於後世是以
終不獲已而竟陳之

荅陸
子靜

來書云人能弘道止敢悉布之某按此段規模宏大而

指意精切如曰雖自謂其理已明安知非私見蔽說
及引大舜善與人同等語尤為的當某雖至愚敢不
承教但所謂莫知其非歸於一是者未知果安所決
區區於此亦願明者有以深察而實踐其言也○來
書云尊兄未嘗止固自不同也某亦謂老兄正為未
識太極之本無極而有其體故必以中訓極而又以
陰陽為形而上者之道虛見之與實見其言果不同
也○來書云老氏以無止諱也某詳老氏之言有無

以有無為二周子之言有無以有無為一正如南北水火之相反更請子細著眼未可容易譏評也○來書云此理乃止子矣更請詳看某前書曾有無理二字否○來書云極亦此止極哉某謂極是名此理之至極中是狀此理之不偏雖然同是此理然其名義各有攸當雖聖賢言之亦未嘗敢有所差互也若皇極之極民極之極乃為標準之意猶曰立於此而示於彼使其有所向望而取正焉爾非以其中而命之

也立我烝民立與粒通即書所謂烝民乃粒莫匪爾極則爾指后稷而言蓋曰使我衆人皆得粒食莫非爾后稷之所立者是望耳爾字不指天地極字亦非指所受之中中者天下之大本乃以喜怒哀樂之未發此理渾然無所偏倚而言太極固無偏倚而為萬化之本然其得名自為至極之極而兼有標準之義初不以中而得名也○來書云以極為中止理乎老兄自以中訓極某未嘗以形訓極也今若此言則是

已不曉文義而謂他人亦不曉也請更詳之○來書云大學文言皆言知至某詳知至二字雖同而在大學則知為實字至為虛字兩字上重而下輕蓋曰心之所知無不到耳在文言則知為虛字至為實字兩字上輕而下重蓋曰有以知其所當至之地耳兩義既自不同而與太極之為至極者又皆不相似請更詳之○來書云直以陰陽為形器止道器之分哉若以陰陽為形而上者則形而下者復是何物更請見

教若某愚見與其所聞則曰凡有形有象者皆器也
其所以為是器之理者則道也如是則來書所謂始
終晦明奇耦之屬皆陰陽所為之器獨其所以為是
器之理如目之明耳之聰父之慈子之孝乃為道耳
如此分別似差明白不知尊意以為如何○來書云
通書曰止類此某謂周子言中而以和字釋之又曰
中節又曰達道彼非不識字者而其言顯與中庸相
戾則亦必有說矣蓋此中字是就氣稟發用而言其

無過不及處耳非直指本體未發無所偏倚者而言也豈可以此而訓極為中也哉來書引經必盡全章雖煩不厭而所引通書乃獨截自中焉止矣而下此安得為不誤老兄本自不信周子政使誤引通書亦未為害何必諱此小失而反為不改之過乎○來書云大傳止孰古某謂大傳洪範詩禮皆言極而已未嘗謂極為中也先儒以此極處常在物之中央而為四方之所面內而取正故因以中釋之蓋亦未為甚

失而後人遂直以極為中則又不識先儒之本意矣
爾雅乃是纂集古今諸儒訓詁以成書其間蓋亦不
能無誤不足據以為古又況其間但有以極訓至以
殷齊訓中初未嘗以極為中乎○來書云又謂周子
止道耳某謂無極而太極猶曰莫之為而為莫之致
而至又如曰無為之為皆語勢之當然非謂別有一
物也其意則固若曰非如皇極民極屋極之有方所
形象而但有此理之至極耳若曉此意則於聖門有

何違叛而不肯道乎上天之載是就有中說無無極而太極是就無中說有若實見得即說有說無或先或後都無妨礙今必如此拘泥強生分別曾謂不尚空言專務事實而反如此乎○來書云夫乾止自反也某謂太極固未嘗隱於人然人之識太極者則少矣往往只是於禪學中認得箇昭昭靈靈能作用底便謂此是太極而不知所謂太極乃天地萬物本然之理互古互今顛撲不破者也迴出常情等語只是

俗談即非禪家所能專有不應儒者反當回避況今
雖偶然道著而其所見所說即非禪家道理非如他
人陰實祖用其說而改頭換面陽諱其所自來也如
曰私其說以自妙而又秘之又曰寄此以神其姦又
曰繫絆多少好氣質底學者則恐世間自有此人可
當此語某雖無狀自省得與此語不相似也○某已
具此而細看其間亦尚有說未盡處大抵老兄昆仲
同立此論而其所以立論之意不同子美尊兄自是

天資質實重厚當時看得此理有未盡處不能子細

推究便立議論因而自信太過遂不可回見雖有病
意實無他老兄却是先立一說務要突過有若子貢
以上更不數近世周程諸公故於其言不問是非一
例吹毛求疵須要討不是處正使說得十分無病此
意却先不好了況其言之粗率又不能無病乎夫子
之聖固非以多學而得之然觀其好古敏求實亦未
嘗不多學但其中自有一以貫之處耳若只如此空

疎杜撰則雖有一而無可貫矣又何足以為孔子乎
顏曾所以獨得聖學之傳正為其博文約禮足目俱
到亦不是只如此空疎杜撰也子貢雖未得承道統
然其所知似亦不在今人之後但未有禪學可改換
耳周程之生時世雖在孟子之下然其道則有不約
而合者反覆來書竊恐老兄於其所言多有未解者
恐皆未可遽以顏曾自處而輕之也顏子以能問於
不能以多問於寡有若無實若虛犯而不校曾子三

省其身惟恐謀之不忠交之不信傳之不習其智之
崇如彼而禮之卑如此豈有一毫自滿自足強辯取
勝之心乎來書之意所以見教者甚至而其末乃有
若猶有疑不憚下教之言某固不敢當此然區區鄙
見亦不敢不為老兄傾倒也不審尊意以為如何如
曰未然則我日斯邁而月斯征各尊所聞各行所知
亦可矣無復可望於必同也言及於此悚息之深千

萬幸察

答陸
子靜

太極中正仁義之說若謂四者皆有動靜則周子於此更列四者之目為剩語矣但熟翫四字指意自有動靜其於道理極是分明蓋此四字便是元亨利貞四字

仁元中亨義利正貞

元亨利貞一通一復豈得為無動靜乎

近日深翫此理覺得一語默一起居無非太極之妙

正不須以分別為嫌也

答張敬夫

動靜無端陰陽無始天道也始於陽成於陰本於靜流於動者人道也然陽復本於陰靜復根於動其動靜

亦無端其陰陽亦無始則人蓋未始離乎天而天亦未始離乎人也○元亨誠之通動也利貞誠之復靜也元者動之端也本乎靜貞者靜之質也著乎動一動一靜循環無窮而貞也者萬物之所以成終而成始者也故人雖不能不動而立人極者必主乎靜惟主乎靜則其著乎動也無不中節而不失其本然之靜矣○靜者性之所以立也動者命之所以行也然其實則靜亦動之息耳故一動一靜皆命之行而行

乎動靜者乃性之真也故曰天命之謂性○情之未發者性也是乃所謂中也天下之大本也性之已發者情也其皆中節則所謂和也天下之達道也皆天理之自然也妙性情之德者心也所以致中和立大本而行達道者也天理之主宰也○靜而無不該者性之所以為中也寂然不動者也動而無不中者情之發而得其正也感而遂通者也靜而常覺動而常止者心之妙也寂而感感而寂者也

太極說

問周子曰誠無為幾善惡此明人心未發之體而指其
已發之端蓋欲學者致察於萌動之微知所決擇而
去取之以不失乎本然之體而已或疑之以謂有類
於胡子同體而異用之云者遂妄以意揣量為圖如
後

此明

惡幾

此證

惡幾

周子

誠幾

善幾

胡氏

誠幾

之意

之失

善幾

善惡雖相對當分賓主天理人欲雖分派必省宗孽
自誠之動而之善則如木之自本而幹自幹而未上
下相達者則道心之發見天理之流行此心之本主
而誠之正宗也其或旁榮側秀若寄生龐贅者此雖
亦誠之動則人心之發見而私欲之流行所謂惡也
非心之固有盖客寓也非誠之正宗盖庶孽也苟辨
之不早擇之不精則客或乘主孽或代宗矣學者能
於萌動幾微之間而察其所發之向背凡其直出者

為天理旁出者為人欲直出者為善旁出者為惡直
出者固有旁出者橫生直出者有本旁出者無源直
出者順旁出者逆直出者正旁出者邪而吾於直出
者利導之旁出者遏絕之功力既至則此心之發自
然出於一途而保有天命矣於此可以見未發之前
有善無惡而程子所謂不是性中元有此兩物相對
而生又曰凡言善惡皆先善而後惡蓋謂此也若以
善惡為東西相對彼此角立則是天理人欲同出一

源未發之前已具此兩端所謂天命之謂性亦甚汙雜矣此胡氏同體異用之意也曰此說得之而圖子有病已略改定更詳之

答趙致道

來諭謂動靜之外別有不與動對之靜不與靜對之動此則尤所未喻動靜二字相為對待不能相無乃天理之自然非人力之所能為也若不與動對則不名為靜不與靜對則亦不名為動矣但衆人之動則流於動而無靜衆人之靜則淪於靜而無動此周子所

謂物則不通者也惟聖人無人欲之私而全乎天理
是以其動也靜之理未嘗亡其靜也動之機未嘗息
此周子所謂神妙萬物者也然而必曰主靜云者蓋
以其相資之勢言之則動有資於靜而靜無資於動
如乾不專一則不能直遂坤不翕聚則不能發散龍
蛇不蟄則無以奮尺蠖不屈則無以伸亦天理之必
然也

答胡廣仲○以
上文集十一條



御纂朱子全書卷五十二



總校官庶吉士臣張能照

校對官庶吉士臣陳宗本

謄錄監生臣楊師曾